



*Mathatias accompagné de Iudas Machabée son fils, & de ses autres enfans, resiste au Roy Antiochus, qui vouloit abolir la Loy des Iuifs.*



ANTIOCHVS l'illustre qui auoit esté baillé en ostage à Rome, saccagea la ville de Ierusalem, pillale Temple du Seigneur, & prit les vaisseaux d'or qui y estoient: & non content de ce, il fit mettre vne Idole abominable de desolation sur l'Autel de Dieu, fit brûler les liures de la Loy, & vouloit abolir la Religion des Iuifs. Mais Mathatias fils de Iean, fils de Simeon Prestre, & l'vn des fils de Ioachim, en ces iours là vint de Ierusalem, & se logea sur la montagne de Modin, lequel, & cinq fils qu'il auoit, sçauoir, Iean, Simeon, Iudas Machabée, Eleazar & Ionathas, s'opposerent au dessein du Roy Antiochus, & lors vers eux s'assembla grande multitude de Iuifs, les plus puissans d'Israël, tous ceux qui auoient volenté de tenir la Loy, & tous ceux qui s'enfuiotient arriere des maux, se ioignirent avec eux, & les renforcerent grandement, & assemblerent vne armée, de laquelle Mathatias fut le chef & conducteur; & apres son deceds son fils Iudas Machabée luy succeda, & mena la guerre d'Israël avec liesse, lequel magnifia l'honneur de son peuple, & prit le halecret comme vn Geant & s'accoustra d'armures de guerre pour estre és batailles, & defendit l'armée par son épée. Il ressembloit vn Lyon en ses œures, & estoit comme le Lyonceau rugissant près la proye. Il deffit l'armée de Gorgias & de Lisias, & purgea le Temple, edifia vn nouveau Autel, où il fit offrir le sacrifice selon la Loy: & fit faire en la montagne de Sion des hautes murailles, & des fortes Tours, & y mit garnison pour la garder, & cela fait, il fit la guerre aux nations circonuoisines, & plusieurs grands & memorables exploicts de guerre; tellement qu'il réjouissoit Iacob en ses œures, & la memoire est, & sera en benediction eternellement.